

आकाशवाणी

पैहले खास-खास खबरां:-

1. क्वाड विदेश मंत्रिणं दी बैठक अज्ज नमीं दिल्ली च होग।
2. राष्ट्रपति द्रौपदी मुरमू होर अज्जै थवां त्रै दिन दे सिक्किम दौरे पर रौहडन।
3. जम्मू-कश्मीर दे गुलमर्ग च गंडोला च फसे दे 300 सैलानिये गी सुरक्षित बचाया गेआ।
4. नागर विमानन महानिदेशालय नै इबोला रोग दे प्रकोप गी विश्व सेहत संगठन आस्सेया सार्वजनिक सेहत सरबन्धी अंतराष्ट्रीय चिंता दे रुप च घोषित कीते जाने मगरा एअर लाईन लेई मानक संचालन प्रक्रिया जारी कीती।
5. दिल्ली च CNG दी कीमतें च 2 रपे फीह किलोग्राम स्हाबै बाद्दा- हुन नमीं कीमत 83 रपे 9 पैसे फीह किलोग्राम होई गई।
6. फुटबॉल च भारत नै कल सैफ महिला प्रतियोगिता दे ग्रुप-बी मुकाबले च मालदीप गी 11-0 कन्नै हराया।
7. ते आई.पी.एल. क्रिकेट च अज्ज Qualifier One मुकाबले च मौजूदा चैम्पियन रॉयल चैलेन्जर्स बेंगलूरु दा मुकाबला गुजरात टाइटन्स कन्नै होग।

<><><><><><>

EAM Quad

विदेश मंत्री डाक्टर एस. जयशंकर होर अज्ज नमीं दिल्ली च क्वाड मुल्खें दे विदेशमंत्रिणं दी बैठक दी मेज़बानी करडन। बैठक च आस्ट्रेलिया दी विदेशमंत्री पेनी

वोंग- जापान दे विदेश मंत्री तोशि मित्सु मोतेगी ते अमरीका दे विदेश मंत्री मार्को रुबियो होर हिस्सा लैडन। बैठक च क्वाड सहयोग गी अग्गे बदाने- बक्ख-बक्ख पैहले दी प्रगति दी समीक्षा करने ते हिंद प्रशांत क्षेत्र कन्नै जुड़े दे ताजा हालात ते स्थिति पर चर्चा होग। खुल्ले ते समावेशी हिंद प्रशांत क्षेत्र दे क्वाड नज़रिए तैहत मंत्री पिच्छले बरे वाशिंगटन च होई दी चर्चा गी अग्गे बदाडन। आस्ट्रेलिया ते जापान दे विदेशमंत्री कल भारत आए हे। अमरीका दे विदेशमंत्री होर इस म्हीने दी 23 तरीक गी 4 दिन दी भारत यात्रा पर आए हे।

<><><><><><>

Prez- Sikkim Visit

राष्ट्रपति द्रौपदी मुर्मू होर अज्जै थमां त्रै दिन दी सिक्किम यात्रा पर रौहगंन। यात्रा दौरान ओह बक्ख-बक्ख कार्यक्रमें च हिस्सा लैडन ते केई थाहरें दा दौरा लाडन। अज्ज संजा राष्ट्रपति होर गंगटोक च नामग्याल तिब्बत विज्ञान संस्थान जाडन। कल राष्ट्रपति नाथू ला दर्रे दा दौरा करडन ते उत्थे तैनात सैनिकें कन्नै गल्लबात करडन। ओदे मगरा ओह गंगटोक च सिक्किम विश्वविद्यालय दे दीक्षांत समारोह च शामिल होडन। दौरे दे खीरी दिन राष्ट्रपति गंगटोक दे पालजार स्टेडियम च आयोजित समारोह च सिक्किम पुलस गी राष्ट्रपति पुलस ध्वज प्रदान करडन।

<><><><><><>

Gulmarg -Gandola

गुलमर्ग गंडोला रोप-वे पर तकनीकी खराबी होने दे चलदे कल केई घंटे तगर बिच्च रस्ते फसे दे 3 सौ शा मते सैलानियें गी सेना- जम्मू-कश्मीर पुलस ते होरनी एजेंसिएं

आसेया चलाए गेदे सांझे अभियान मगरा कामयाबी कन्नै बचाई लैता गेआ। एशिया दे सब्भनै शा उच्चे रोप-वे च तकनीकी समस्या होने दे फौरन बाद गै इक बड़डा ब्चाह अभियान रम्भ करी दिता गेआ। खबर ऐ जे किश कैबिनै गी खाली करने च मता चिर लग्गा- कीजे ओह जिमी शा तकरीबन 500 फुट ऊंचाई पर हे। इन्नै गै नई इलाके च भारी बरखा कारण बी बचाऽ आहले कम्मे च विध्न पेआ। तौआई उपराज्यपाल मनोज सिन्हा ते मुखमंत्री उमर अब्दुल्ला होरें गुलमर्ग दे गंडोलें च फसे दे 300 सैलानिये गी सुरक्षित बनाई लैने पर आपदा कारवाई टीमें आसेया दस्सी गेदी बहादुरी दी सराहना कीती ऐ। मुखमंत्री उमर अब्दुल्ला होरें इस हादसे दे कारणें दा पता लाने लेई जांच दे हुकम दिते न।

<><><><><><>

DGCA

नागर विमानन महानिदेशालय (DGCA) नै Congo ते Uganda च इबोला रोग दे प्रकोप गी विश्व सेहत संगठन आसेया सार्वजनिक सेहत सरबन्धी अंतराष्ट्री चिंता दे रूप च घोषित कीते जाने दे बाद Airlineएं लेई मानक संचालन प्रक्रिया जारी कीती ऐ। DGCA नै आखेआ ऐ जे Uganda ते Congo कन्नै ब्हाई गोआरियां चलाने आली एअलाइनें गी जरूरी ऐ जे ओह यात्रियें दे उतरने शा पैहले Self Declaration यानि आप-घोषणा फार्म भराइयै जमा करना यकीनी बनान।

<><><><><><>

HM- Border Unit

केन्द्री गृह मंत्री अमित शाह होर अगले किश दिनें दौरान मुल्खे दे बन्ने आले इलाकें दा दौरा करडन ते सुरक्षा सरबन्धी बैठकां करडन। अमिता शाह होर कल राजस्थान दे बीकानेर पुज्जे हे। उन्दा अज्ज बड्डलै BSF दा Sanchu सीमा चौकी दा दौरा लाने दा कार्यक्रम ऐ- जित्थे ओह सुरक्षाबलें दे जोआनें कन्नै गल्लबात करगंन ते उन्दे लेई कल्याणकारी योजनाएं दा उदघाटन करडन। दपैहरी मगरा ओह बीकानेर च बन्ने आले इलाके च सुरक्षा हालात दा जायजा लैगंन।

<><><><><><>

Goyal CEPA

केन्द्रीय उद्योग ते बपार मंत्री पीयूष गोयल होरे ओटावा च कनाडा दे प्रधानमंत्री मार्क कार्नी हुंदे कन्नै मलाटी कीती ते प्रधानमंत्री नरेन्द्र मोदी हुंदी पेठा दा शुभकामनी दितियां। इस दौरान दौने नेताएं बश्कार दपक्खी सहयोग गी होर मज़बूत करने पर सकारात्मक ते दूरदर्शी चर्चा होई- कन्नै गै भारत- कनाडा व्यापक आर्थिक सांझेदारी समझौता CEPA गी तौले पूरा करने पर सहमति जताई गई। पीयूष गोयल होरें आखेआ जे एह समझौता दौनें मुल्खें आस्तै विकास ते समृद्धि दे नमें मौके खोलोग। उनें प्रधानमंत्री कार्नी हुंदी हालिया भारत यात्रा गी दपक्खी सरबन्धें गी नमीं गति देने आहला दस्सेआ।

<><><><><><>

AYUSH

आयुष मंत्री प्रतापराव जाधव होरें आखेआ जे सरकार योग ते कुदरती चिकित्सा दे राएं मुख्य च बमारिएं दी रोकथाम कन्नै जुड़ी दी सेवाएं गी मज़बूत करा'रदी ऐ। नमीं

दिल्ली च आयुष मंत्रालय दी संसदीय सलाहकार समीति दी बैठक दी अध्यक्षता करदे होई जाधव होरें आखेआ जे योग ते कुदरती चिकित्सा भारत दी प्राचीन देन ऐ ते हुन एह कुदरती चिकित्सा वैश्विक सेहत सरबन्धी अभियान दी महत्वपूर्ण हिस्सा बना रदी ऐ। जाधव होरें दस्सेआ जे मुख्य भरै च कुदरती चिकित्सा ते योग विज्ञान दे 70 थमां मते कालेज ते 5 जहार थमां मते योग सिखलाई संस्थान संचालित होआ रदे न।

<><><><><><>

CNG- Price Hike

दिल्ली च कंप्रेसड नेचुरल गैस CNG दी कीमतें च 2 रपे फी किलोग्राम दे स्हाबै बाददा कीता गेआ ऐ। अज्ज बड्डलै 6 बजे थमां लागू नमीं दरें दे बाद राष्ट्रीय राजधानी च CNG दी नमीं कीमत 83 रपे 9 पैसे फी किलोग्राम होई गई ऐ।

<><><><><><>

Haj

भारत सनें दुनिया भरै थमां लक्खां बद्दे लोक अज्ज सऊदी अरब च हज यात्रा करडन। 5 रोजा हज दे पैहले दिन कल हज यात्री मीना दी टेंट सिटी च किट्ठे होए। हज यात्री अज्ज पूरा दिन अराफात दे मैदान च पूजा-अर्चना इबादत करडन। एदे मगरा हज यात्री निमरा मस्जिद च हज दा विशेष संदेश खुत्बा-ए-हज सुनगंन ते दपैहरी ते संजा'लै नमाज अदा कीती जाहग। कल बड्डलै हज यात्री मीना परतोई औडन- जित्थे ओह कुर्बानी ते कंकड मारने दी प्रतीकात्मक रस्म पूरी कीती जाहग।

<><><><><><>

US Prez –Abraham Accords

अमरीकी राष्ट्रपति डोनाल्ड ट्रम्प होरें आखेआ ऐ जे ईरान युद्ध खत्म करने आस्तै कुसै बी समझौते च सऊदी अरब ते पाकिस्तान सनैं केंई सारे मुल्खें गी अब्राहम समझौते च शामिल कीते जाना लोड़चदा। सोशल मीडिया प्लेडफार्म दुथ पर पोस्ट करदे होई ट्रम्प होरें आखेआ जे ईरान कन्नै गल्लबात खरी चाली अग्गे बदा रदी ऐ। हालांकि उ'नैं चेतावनी दिती जे एह समझौता सारे आस्तै बेहतर होना लोड़चदा नेंई ते कोई बी समझौता नेंई होग ते फही संघर्ष दी स्थिति बनी सकदी ऐ। उ'नैं आखेआ जे कुसै बी संभावित समझौतें गी अब्राहम समझौते दे विस्तार कन्नै जोड़ेआ जाना चाईदा-जिसी उ'नैं पच्छिम एशिया आस्तै इक ऐतिहासिक मौका दस्सेआ। अब्राहम समझौता अमरीका दी मध्यस्थता ते इज़रायल ते केंई अरब ते मुस्लिम मुल्खे बश्कार सरबंध सामान्य बनाने आस्तै शुरु कीता गेआ हा।

<><><><><><>

US Russia Talk

अमरीका दे विदेश मंत्री मार्को रुबियो नै रूस दे विदेश मंत्री सर्गेई लावरोव हुंदे कन्नै गल्ल कीती ते रूस यूक्रेन युद्ध ते ईरान दी स्थिति पर विचार-विर्मश कीता। अमरीका च विदेश विभाग दे प्रवक्ता टॉमी पिगोट नै इस सरबंध च जानकारी दिती ऐ। रूस दे विदेशमंत्री होरें साफ कीता जे यूक्रेन दे सैन्य ठिकाने पर हालिया रूसी हमले-यूक्रेन सरकार आसेया रूसी क्षेत्र च शांतिपूर्ण अबादी ते नागरिक थाहरें पर लगातार हमले दा सीद्धा परता ऐ। अमरीका दे विदेशमंत्री हुंदे कन्नै गल्लबात च लावरोह होरें रूसी

विदेशमंत्रालय दी उस सिफारिश गी बी दौहराया जेदे च अमरीका सनें मुल्खें गी यूक्रेन दी राजधानी कीव थमां अपने राजनयिकें गी फौरी निकलने आस्तै आखेआ गेआ ऐ।

<><><><><><>

SAFF Women

फुलबाल च भारत नै कल गोवा दे मडगांव च सैफ महिला प्रतियोगिता दे ग्रुप-बी मुकाबले च मालद्वीव गी 11-0 कन्नै हराई दिता। अविका सिंह नै 4 गोल कीते। 5 बारी दी चैम्पियन टीम भारत दा अगला मुकाबला ऐतवारे मौजूदा जेत्तू टीम बांगलादेश कन्नै होग।

<><><><><><>

IPL

आई.पी.एल. क्रिकेट च अज्ज Qualifier –One मुकाबले च मौजूदा चैम्पियन रॉयल चैलेंजर्स बेंगलूरु दा मुकाबला गुजरात टाईटन्स कन्नै होग। एह मैच धर्मशाला च संज्रा साइडे 7 बजे शुरु होग। इस मुकाबले दी जेत्तू टीम सीद्दे IPL 2026 दे फाईनल च पुज्जी जाहग- जिसले के हारने आहली टीम गी Qualifier -2 च इक होर मौका थहोग। कल मोहाली च एलिमिनेटर मुकाबले च Sunrisers हैदराबाद दा मुकाबला राजस्थान रॉयल्स कन्नै होग।

<><><><><><>

IMD

मौसम विभाग नै दिल्ली आस्तै अगले 3 दिनें दरान लू चलने दा यैलो अलर्ट जारी कीता ऐ। राश्ट्री राजधानी दिल्ली, छत्तीसगढ़, मध्य प्रदेश, पूर्वी राजस्थान, झारखंड, तेलंगाना ते पच्छमी उत्तर प्रदेश च बी लू दी स्थिति बनी रौहने दी मेद दस्सी गई ऐ। दिल्ली च तापमान 44 थमां 46 डिग्री सेल्सियस बने रौहने दी संभावना ऐ। पूर्वी उत्तर प्रदेश ते विदर्भ च रातीं दा मौसम गर्म रेई सकदा ऐ। इस दरान पूर्वोत्तर दे किश हिस्सें, सिक्किम, केरल, माहे, तमिलनाडू ते पुदुचेरी च तेज बरखा दा अनुमान जताया गेआ ऐ।

तोंआई जम्मू खिते च जंदे रोज गर्मीं दा प्रकोप बरोबर जारी रेहा- कीजे शैहरा दा बद्दोबद्द तापमान 40 इशारिया 3 डिग्री सैलसियम दर्ज कीता गेआ- जेहड़ा हूनै तगर इस रुतै दा सब्भनें शा गर्म ध्याड़े चा इक ऐ। आकाशवाणी दे जम्मू संवाददाता नै जानकारी दिती ऐ जे श्री माता वैष्णो देवी जी दे आधार शिविर कटड़ा च 37 इशारिया 8 डिग्री सैलसियम तापमान रिकार्ड कीता गेआ ऐ- जिसले के बनिहाल- बटोत ते भद्रवाह सनें होरनें पहाड़ी इलाकें च तापमान ठंडा रेहा। जम्मू च बदधे तापमान गी दिक्खदे होई स्कूली शिक्षा मैहकमे नै पैहली जून थमां गर्मियें दी छुट्टियें दी घोषणा करी दिती दी ऐ।

<><><><><><>